

楞

嚴

貫

攝

(四)

中華民國二十四年十月初版

◎每部定價大洋壹元伍角

(外埠酌加郵匯)

出版者 佛學書局 沈彬翰

印刷者 國光印書局
上海新大沽路口 電話三三七四三

總發行所 上海佛學書局
愚園路一五四號 電話三五五二四

分發行所 佛學書局分局

上海麥特赫司脫路 上海新民路國慶路
上海望平街有正書局 上海愛多亞路慈林
長沙玉泉街七十號 杭州西湖龍翔橋
北平東四南大街 福州下南路廿四號

分銷處 各埠佛經流通處

楞嚴貫攝

全 四 冊

楞嚴說通卷之九

巴縣了庵居士劉開纂述

成都昭覺沙門方雷鑒定

阿難。世間一切所修心人。不假禪那。無有智慧。但能執身不行。雖欲若行。若坐。想念俱無。愛染不生。無留欲界。是人應念。身爲梵侶。如是一類名梵衆天。

此下明色界四禪十八天。而此先明初禪第一天也。阿難。世間一切所修心人。凡迷冥修。各各自謂真正修心。然而不假禪那。無首楞嚴定。無有智慧。無金剛慧。但以有漏靜慮爲因心。制彼婬習。而執身不婬。或行或坐。於一切時。想念俱無。愛染不生。夫六欲縱強忘情。不免身犯。此身全遠。梵行方成。由彼身心俱潔。下無卜居。故臨終時。應念而生。梵世爲

梵民如是一類。名梵衆天。而較之欲界穢濁。又高出一層矣。○通後十八天。雖離欲染。尙有色質。故通名色界。又通名梵世。謂已離欲染也。通號四禪。爲已離散動也。欲天但十善感生。此天兼禪定感生。然特有漏禪觀六事行耳。六行者。厭欲界是苦。是粗。是障。欣色界是淨。是妙。是離。此則凡夫伏惑。超欲界道也。問。前天亦間有禪定。而此界方名禪者。何故。答。以前結云。形雖出動。心跡尙交。自此以上。絕無女人。心跡俱離。無所交接。兼無食眠。三欲俱忘。稍覺饑倦。卽入禪定。出定則飽滿精明。是但以禪悅爲食。爲息。而稍離粗重身心也。又此天獨顯戒德。而未彰定慧。後二天略顯定慧。至文自見也。

欲習既除。離欲心現。於諸律儀。愛樂隨順。是人應時能行梵德。如是一類。名梵輔天。

此明初禪第二天。此天戒與定共也。夫前天欲習雖除。心相未至顯現。此則離欲清淨。心相現發著明。於諸梵行戒品。愛樂而悅豫。隨順而輕安。此卽與定共之相也。是人臨終宿習不忘。應念而行梵德。不但清淨身心。亦且宏揚德化。如是一類。名梵輔天。而能匡弼梵王矣。

身心妙圓。威儀不缺。清淨禁戒。加以明悟。是人應時能統梵衆。爲大梵王。如是一類。名大梵天。

此明初禪第三天。此天戒與慧俱也。夫初天由執身而攝心。次天由心現而行德。此則雙攝身心。得一如無二之妙。滿足分量之圓。於是行住坐臥。皆妙圓而威儀不缺。以此清淨禁戒。而又加以明悟。從定戒中。發智慧。此卽與慧俱之相也。由其慧勝前天。堪爲梵主。是人臨終應念而生梵天。統攝梵衆。爲大梵王。如是一類。爲大梵天。其德皆足以長人。

矣。

阿難此三勝流。一切苦惱所不能逼。雖非正修真三摩地。清淨心中。諸漏不動。名爲初禪。

此統結三天名。初禪也。阿難此三天者。皆勝欲界諸趣。同名勝流。已離欲界八苦。故苦惱不逼。雖非正修真三摩地。去首楞嚴大定甚遠。然彼戒心清淨。漏雖未伏。亦自遏抑不動。初得禪定。無有利那雜念間入。故統而名之。曰初禪焉。○禪有四類。一有漏禪。卽今四禪也。二無漏禪。謂九想八背等也。三亦有漏。亦無漏禪。謂六妙通明等也。四非有漏。非無漏禪。卽今經首楞嚴大定也。以上三天。疑非豎分。夫天民天臣天王。各居一層。何成一統。且臣民若許衆多。而天王滿天。獨居一層。彼此皆王。何所使令。或是以德之優劣相較。堪爲民爲輔爲王耳。故列爲三者。非

一天盡臣民而無王。一天盡王而無臣民也。又初之二天。尋伺皆有。第三天。無尋有伺。由內有尋伺。故外感火災。而火災壞初禪也。

阿難。其次梵天。統攝梵人。圓滿梵行。澄心不動。寂湛生光。如是一類。名少光天。

此二禪。初天也。阿難。其次二禪。卽此大梵天。統攝梵人者。而能滿圓梵行。至於澄心不動。則寂湛之極。而生光明。但光明尙劣。未極其量。如是一類。又升梵天一層。名少光天。所謂泰宇定而天光發。但非周徧湛寂之比耳。○此天疑從彼天中修來。蓋躡前行而但加圓滿。則升此天矣。問此與菩薩寂照何殊。答人法二執。毫髮未動。但以離欲得定。定深生照而已。此其別也。又前有覺觀粗動。發生三識。今內淨一心。已無覺觀。惟緣內塵。不同初禪有三識也。

光光相然。照耀無盡。映十方界。徧成琉璃。如是一類。名無量光天。
此二禪第二天也。從前少光。更發多光。光光相然。照耀無盡。映十方界。
成琉璃色。此雖已極其量。猶未成音。如是一類。名無量光天。然非如淨
琉璃內含寶月之比也。○按此天雖不能映諸大千。而於本界亦覆小
千。當滿一千箇四天下十方界也。

吸持圓光。成就教體。發化清淨。應用無盡。如是一類。名光音天。
此二禪第三天也。夫光光相然。則成圓光矣。由是吸攬保持此圓光。卽
以光明代其言音。而成就教體。於以闡揚梵教。發清淨化。隨機開示。應
用無盡。如是一類。名光音天。謂其不假言詮。而以光爲音也。○按此天
已無尋伺。故無語言。而但用光明作佛事。然亦非盡無語言也。如世間
紙墨文字。雖代言教。豈盡廢其言語哉。

阿難。此三勝流。一切憂懸。懸不安也。或作愁字之誤。所不能逼。雖非正修真三摩地。清

淨心中。蠱漏已伏。名爲二禪。

此總結三天名二禪也。阿難。此三勝流。當定生時。與喜俱發。以有定喜。滅世間憂愁。故憂懸不能逼。雖非正修三摩。去楞嚴大定尙遠。然而清淨心中。已伏蠱漏。較初禪之漏心不動而未能伏者。已進一籌。故統而名之曰二禪焉。○地持論目第二禪名喜俱禪。此三天總名定生喜樂地。憂懸與苦惱不同。苦惱乃粗重。切於身心。憂懸輕細。但涉於念慮而已。蠱漏已伏者。謂以定力伏前五識。由伏前五。故無尋伺。未伏第六。故有喜樂。內有喜水擾動。故外感水災。而水災壞二禪也。前三天以戒勝。此三天以定勝也。

阿難。如是天人。圓光成音。披音露妙。發成精行。通寂滅樂。如是一類。名少

淨天。

此三禪第一天也。阿難。由前天人。既以圓光而爲教體矣。披光卽披音也。披音則妙理自露。然有喜心。分別亂動。能障定樂。此天能依此妙理。發成精行。而通寂滅樂。離前喜動。而生淨樂。恬泊寂靜。故名寂滅。由伏第六識。故相似二乘之寂滅。非生滅既滅。寂滅現前之比也。如是一類名少淨天。定樂纔通。淨空初顯。故名少淨也。○能通而已。尙未能成。以猶劣故。名少淨焉。

淨空現前。引發無際。身心輕安。成寂滅樂。如是一類。名無量淨天。此三禪第二天也。由伏六識。而似得人空。故淨空現前。前但得淨。此更發空。漸以虛豁。至無邊際。且前通寂滅。但樂內心。此則身心內外。皆得輕安。積中發外。廓然廣大。則寂滅已成。淨空無量。如是一類。名無量淨

天而升少淨一層矣。

世界身心一切圓淨。淨德成就。勝託現前。歸寂滅樂。如是一類。名徧淨天。此三禪第三天也。前天淨樂止在身心。未名爲徧。此則合世界身心。觸處無非妙樂。是謂一切圓淨。既世界身心圓淨。豈非淨德成就乎。然雖淨德成就。原非可託可歸之地。此天人便認此爲終身託宿之地。而勝託現前。認此爲清淨極樂之鄉。而歸寂滅樂。將謂安身立命。唯此而已。由前未融世界。雖淨而不徧。今並融之。故如是一類。名徧淨天。又升無量淨一層矣。

阿難。此三勝流。具大隨順。身心安隱。得無量樂。雖非正得真三摩地。安隱心中。歡喜畢具。名爲三禪。

此總結三天名三禪也。阿難。此三勝流。隨順淨樂。至無量周徧。其爲隨

順也大矣。且初二禪心有喜受。故多散動。不得身親受樂。今則喜受既除。身心安穩。自在受用。無量妙樂。此雖非正得真三摩地乎。而安穩心中。歡喜畢具。夫喜者動心所發也。樂者靜心所融也。若在飛動心。縱樂而仍是喜支也。若在安穩心。縱喜而仍是樂支也。今歡喜而出於安穩。是謂離喜之喜。妙樂之樂。離喜妙樂。故統而名之曰三禪焉。○地持論目第三禪爲樂俱禪。此三天總名離喜妙樂地。蓋前二禪雖有樂支。爲喜支所障。今滅喜純樂。故得其名也。又此三天已伏意識。雖無喜受。尙有出入息擾亂。故外感風災。而風災壞三禪也。

阿難。復次天人。不逼身心。苦因已盡。樂非常住。久必壞生。苦樂二心俱時頓捨。麤重相滅。淨福性生。如是一類。名福生天。

此下明四禪九天。而此明第一天也。然天雖有九。而四禪報境。但有三

天第四無想。乃廣果別開。是外道報境。此四之上五不還天。乃聖賢別修靜慮。與凡夫不同也。阿難。復次三禪天人。初禪苦惱離。二禪憂懸盡。皆能不逼身心。苦因已盡。第三禪則無苦有樂。然而樂亦不當受之也。蓋樂非常住。久必壞生。壞卽成苦矣。此天既已離苦。亦不受樂。將苦樂二心一時頓捨。樂既不受。壞亦不生。苦壞雙超。故麤重相滅。一切下地災患已斷。而清淨福性。油然發生。由捨生福。名福生天焉。可見不能捨樂。則壞生矣。苟能捨樂。則福生矣。捨不捨之間。此天之別於前天也。捨心圓融。勝解清淨。福無遮中。得妙隨順。窮未來際。如是一類。名福愛天。此四禪第二天也。前天初專於捨。未免偏空。此既純熟。漸不礙有。是謂捨心圓融。前以捨樂爲清淨。此則樂受既空。復不礙有。是謂勝解清淨。以勝淨生勝福。故福無遮限。有所願求。無不如意。得妙隨順。直窮於未。

來際焉。然雖受報無窮。亦非真得常住。如是一類。名福愛天。謂諸天之福。惟此天爲最可愛也。

阿難。從是天中有二歧路。

此明四禪第三天而先別其有二路也。阿難從是福愛天而升焉。有兩條歧路。一直往而趣廣果。一迂僻而趣無想。心念行業各自不同。學者可弗辨耶。○賀云。二歧路者。一精進。一斷滅也。不取苦樂。亦不厭苦樂。但以四無量心薰修福德。證廣大果。名廣果天。若以苦樂爲可厭而執著捨心。精研不斷。所謂苦樂心滅。厭捨心生。全是生滅之因矣。從此窮極捨道。獲受灰心之果。彼自以爲不生不滅。豈知生滅之因。必不能發明。無生滅之性乎。初生此天。未全無想。經半劫始無。後半劫復生矣。若於先心。無量淨光。福德圓明。修證而住。如是一類。名廣果天。

何謂二歧。一者若於福愛天中。圓融捨心。所發無量淨光。於是光中。但修四無量心。滋長福德。至於增盛圓明。剋取修證。以爲常住。如是一類。名廣果天。蓋福德圓明。則證果廣大。色界諸天。所感福報。至此爲極。故名廣果也。要知四禪報境。惟此三天。第四無想。是福愛之差。及五不還天。乃三果聖人之別寓耳。

若於先心。雙厭苦樂。精研捨心。相續不斷。圓窮捨道。身心俱滅。心慮灰凝。經五百劫。是人既以生滅爲因。不能發明不生滅性。初半劫滅。後半劫生。如是一類。名無想天。

二者若於福愛天中。捨樂之心。雙厭苦樂者。而精以研之。深搜細索。相續不斷。而勤勇無間。圓窮捨道。而必求究竟。不惟樂受捨。而捨樂之心。亦捨。以捨定滅除捨心。至於身心灰滅。渾成晦昧。冥然一空。如所謂槁

木死灰者。其壽經歷五百大劫。若是其長。不知其所謂灰凝者。非真不生滅也。如夾冰魚。如壓石草。其微細生滅流住。何嘗止息。蓋是人本以生滅爲因。錯依六識生死根本爲本修因。強令灰凝。安能認取識精明元。而發明圓湛不生滅性乎。所以初生此天。習定半劫。始得滅想。此天報盡。至四百九十九劫半後。想心復生也。如是一類。名無想天。而並廣果爲二歧矣。○按廣果天厭苦樂而增修福慧。此天則厭苦樂而精研捨心。此兩天所以分歧也。橫列歧路。則亦非豎分矣。問此無想定。與滅盡定。有何差別。答滅盡定。既滅第六識。兼滅第七染分。無想但滅六識分別見。而諸邪見。尙未能盡。何況其他。問身界俱空。與下四空何異。答出定則有。故不同也。又按三界總有二十八天。二惟凡位。五惟聖位。其餘皆是凡聖同居。二凡位者。謂大梵天。妄說能造天地人物。憍慢輕蔑。

故聖賢不居此無想天。惟是外道修無想定者。生之受五百劫無心之報也。五聖位者。卽下五那含也。

阿難。此四勝流。一切世間諸苦樂境。所不能動。雖非無爲真不動地。有所得心。功用純熟。名爲四禪。

此總結四天名。四禪也。阿難。此四勝流。同修雙捨。故世間苦樂二境。所不能動。以其不能動也。而遽謂之不動地焉可乎。夫聖位第八。證真無爲。名不動地。斯真不動也。此天雖非此地之比。而有所得心。有爲功用。至此已覺純熟。故統而名之曰四禪焉。蓋真不動地者。以其滅六盡七也。有所得心者。但能伏六識也。聖凡疆域。判然不濫矣。○以上禪天初禪伏鼻舌二識。無段食故。二禪伏前五識。三禪伏意識分別現行。故得妙樂。四禪伏意識分別種子。故得妙捨。總是伏第六分別見惑耳。然則